

四庫全書

子部

欽定四庫全書

廣川書跋卷七

宋董道 著

砥柱銘

唐砥柱銘貞觀十二年特進魏徵撰祕書正字薛純書其字因山鑿鑿就其窪平隨多少置字故不成行序宛轉索於嵌嵌間以摹故石雖存而頗難得世知賢之唐以書學相高刻石之文此其最大者也筆力有餘點畫不失尚多隸體氣象奇偉猶有古人體灋其後柳公權

書刻招提今已譌缺不可讀惟純所書在濁河間得完
蓋摹擊之工不至雖濤浪射發風雨摧剥尚不廢也

醴泉銘

九成宮醴泉銘唐祕書監魏徵撰率更令歐陽詢書按
唐書貞觀中改隋仁壽宮為九成宮永徽中又改為萬
年宮宮在岐州開皇十三年楊素所治也徵言宮城之
內本乏水源六年四月西城之陰土覺有潤以杖導之
有泉隨而涌出因名醴泉不知何据也漢書京師醴泉

飲者痼病皆瘳故漢儒集禮有地出醴泉天降甘露以
為人主之瑞而不知者謂水從地出其味若醴如此則
列子所謂神漢者顧漢魏郡國與唐離宮安得有此尔
足曰甘雨時降萬物以嘉謂之醴泉蓋甘露雨也今据
此則論者不知其所出也故著其說

歐陽詢帖

余求前人論書必先擇筆至於動作皆得如意非是未
嘗書也韋昶善書而妙於筆故子敬稱為奇絕然書必

託於筆以顯則筋骨肉理皆筆之所寄也率更於筆特未嘗擇而皆得佳趣故當是絕藝益其所寄者心爾論者謂飛白冠絕有龍蛇戰鬪之象雲霧輕飄之執真行出于大令森森焉若武庫矛戟至使智永奪氣信乎書妙至此極者然飛白篆書世不復傳今收真行章草可見知畧無勦敵非虛語也虞伯施謂詢不擇紙筆皆得如意此正紀其實耳宜遂良不能及也

虞世南別帖

虞伯施手帖論儒學不使一日失業恐子弟墜其家聲
且戒之使其不息也觀北堂書鈔大見功力深至非積
學之久不能盡此子纂雖識書學而文業衰矣故知虞
氏九世文名為儒林所嘆可以為難也方隋時伯施以
文學推選任祕書郎來護兒以蚤略任將帥至唐來氏
有恒濟反以文顯而虞氏子昶以下不能世其業而為
入仗宿衛故陸元方戲曰來護兒兒把筆虞世南男帶
刀故曰雖在父兄不能移子弟理固然也

來恒本傳曰
恒濟兄弟相

次知政事世南子昶無才術歷將作少匠主工作許敬宗曰護兒兒作相世南男作匠文武豈有種耶

薛稷雜碑

書貴得法然以點畫論法者皆蔽於書者也求法者當在體用備處一法不亡濃纖健決各當其意然後結字不失疏密合度可以論書矣薛稷於書得歐虞褚陸遺墨至備故於法可据然其師承血脉則於褚為近至於用筆纖瘦結字疏通又自別為一家然世或以其瘦快至到又似不論成法者也劉景升為書家祖師鍾繇胡

昭皆受其學然昭肥繇瘦各得其一體後世不謂昭不及繇者觀其筆意他可以不論也

李衛公書

世傳扶餘國事類若劍俠而衛公從之似以任縱自嬉而放悍不制者然考其行事則動以禮法自約又若老書生深究進退存亡者信王佐器世或未易量也此書豪武自將亦既放矣或疑其偽將其暴侮神羞求合於杳冥者乎亦當時憤激感慨豪氣未除而然耶劉餗嘗

言衛公訴神且請告以官位所至詞色抗厲後有聲曰
僕射好去顧不見後果如言此書逮似或真有是耶將
後人因此而附益之乎鍊在開元中其說似有據是則
若可信也

褚河南聖教序

褚河南書本學逸少而能自成家法然疏瘦勁鍊又似
西漢往往不減銅籀等書故非後世所能及也晉逸少
所受書法有謂多骨微肉者筋書多肉微骨者墨褚多

力豐筋者聖無力無筋者病河南豈所謂瘦硬通神者耶

遂良帖

褚河南於書蓋天然處勝故於學雖雜而本體不失初學晉右軍既又學虞伯施後於史陵得用筆意乃曰此法更不可教人是其妙處也羿之立教必志於穀至巧之所極當自其心得非可法度準繩授也學至於此當自知之



辯法師碑

辯法師碑薛純陀書晉歐陽文忠公嘗許其字不減率
更然所書不傳於後永永所得純陀書惟此不知又有
甚焉者也貞觀十二年奉敕書銘砥柱其字磊落如山
石自開隱鱗而出可以見方丈之執矣固無牽強以成
也當時如虞伯施褚登善號能書者皆避而讓之其後
柳誠縣愛其書恐失其次第則又別書於石後世得純
陀所書砥柱銘者皆碎雜叢疊必按此而序之砥柱銘

薛純而此碑為薛純陀嘗為祕書省正字本名純陀後以純自別于時檢于類書見之

碧落碑

碧落篆李肇得觀中石記知為陳惟玉書歐陽永忬以李漢碑為黃公譔然字法奇古行筆精絕不類世傳篆學而惟玉於唐無書名於世不應一碑便能奄有秦漢遺文徑到古人絕處此後世所疑也李陽冰於書未嘗許人至悉其書寢卧其下數日不能去世人論書不逮

陽冰則未必知其妙處論者固應不同段成式謂此碑有碧落字故世以名之李肇謂此碧落觀也故以為名李漢謂終于碧落字而得名余至絳州見其處今為龍興宮考其記知舊為碧落觀而開元改今名又篆文若未畢其文者其終非碧落字則肇說是也其云有唐五十三禩龍集敦牂尔足歲在午為敦牂永永謂高宗總章三歲以唐歷考之自武德戊寅受命至咸亨元年庚午寶五十三年矣然則總章者誤也

別本碧落碑

絳州碧落篆刻天尊背州將不欲以槌擊石像乃摹別石因封其舊石像今世所得皆摹本也雖橫直園方典刑有稽然遁其神者衆矣段成式言樊宗師作誌令陳惟玉書立太行山上此言險怪難知豈嘗求得其當而妄為戲哉世言字不考古甚則以品為鄰今於古文四字正如此便知後世不知古字而妄議者可以歎也

歐陽通碑

詢之子

書家擇筆如逢蒙求弓矢必得勁良然後及遠中微然
弓勁矢良當求其材可為者非是雖得善工不能極其
精也漢世郡貢兔毫當時惟趙國為勝而工製或異亦
復不良議者謂兔豪無優劣工手有巧拙正應工手不
得則不得論其豪也路扈一世名手且重以雜寶為跗
然其善不過秋兔之毫及其後世漸以豐狐為柱然鋒
穎穎芒非兔翰莫可為者歐陽通於書過自矜重至以
狸豪為覆兔豪管皆象犀然筆用兔穎自替不能改至

於為柱則或假用他毛若遂用狸為鋒心恐不得若兔
豪之剛柔順適能中人意也後世或假胎髮羊毛雞毛
鼠鬚亦皆成筆然不能盡其利用故知其特貴異爾王
逸少謂有人以綠沈黍竹管見遺錄之多年斯亦可愛
玩詎必金寶彫琢然後為貴管人或以琉璃象牙為管
麗飾則有之然筆貴輕便重則躓矣不知貴犀象管者
定可得輕便哉矜持太過失其常理是有媿不擇紙筆
者非能其父書也

歐陽通別帖

今世所見歐陽通書惟三碑其別帖殆存此也筆力勁
險盡得家風但微失豐濃故有媿其父至於驚竒跳駿
不避危險則殆無異也書家論通比詢書失於瘦怯薛
純比詢書傷於肥鈍今視其書可信也

智乘院碑

長子智乘院碑唐鄭王文學阮立德謨李承福書碑成
於咸亨中則天帝時也考次鄭王元齡懿高祖第十三

子武德四年分國于滕出刺沅州貞觀七年徙鄭十七年持潞州節改絳州一年再持節潞州復持節絳州所至以能稱善決大獄高宗褒以優詔當其時鄭王名重于朝廷為宗室表顯慶元年持節安沔隨郢安州刺史此其所歷也唐書惟叙鄭潞絳三州不言再持潞絳節其為安州刺史亦不著也子敬嗣國新舊書皆作璵蓋因其弟琳顯名疑皆從玉也唐存中宗世子皆以材任職而敬之三世為夷簡為宗閔琳之再世為勉皆位宰

相其在當時至顯而史所書若此其可勝孝耶然琛珪
琰璿璫珎碑皆不具而別見于龕石此宜史官不能備
錄也

崔敬嗣墓誌

集古錄曰崔為唐名族而敬嗣不顯余考之唐有兩崔
敬嗣晉中宗放房州吏多肆慢不為禮敬嗣為刺史獨
盡誠推奉中宗復位有與敬嗣同姓者每擬官輒超拜
召見悟非是訪真敬嗣死矣即授子注五品官注生光

遠嘗持節荆襄徙鳳翔又節度劍南其官職甚顯敬嗣亦以此名於世替人偶不考也

陳昭題名

河南石氏得唐陳昭題名制度大備知今日進士刻石甚陋段成式曰慈恩寺題名自張苔於寺中題其同年人因為故事柳氏序訓又謂韋肇初及第偶於慈恩寺塔下題名後進慕效之按苔登科在天寶十三載此時已有題名觀陳昭所書在開元九年則其事可以考也

封氏記神龍已來杏園宴後慈恩塔下題名同年中推
善書者紀之他時有將相朱書之及第後知聞或過未
及第時題名則添前字故李紆不加前字到老恨焉則
題名自唐神龍初有之矣柳氏著書在中和三年其碑
僅存因成故事則余得考之方會昌中陳商知舉奏對
不稱改命王起主文宣旨停曲江大會及題名局席至
中和而後進士復題名慈恩則自廢而後行蓋在此時
也嘗聞唐人言柳宗元劉禹錫題名慈恩寺談元茂秉

筆不欲名字著障目押縱版子者率多不達柳暗斟酌之馬徵鄧文佐盡著版子而宗元竟不達雖一時為戲然德器自可於此見之題名之盛亦一時所尚雖至今不廢但隆殺異爾

六公詠

李北海六公詠今泰和集中雖有詩而無其姓名又其說一章不盡或遺余見荊州六公詠石刻文既不利故得盡存可以序載於此按中宗復位以彥範王扶陽暉

王平陽玄暉王博陵東之王漢陽恕已王南陽世謂五
王然皆梁公所進故邕歎其成大功者六人詩尤奇偉
豪氣激發如見斷鰐立極時至今讀之令人想望風采
宜老杜有云替盧藏用謂邕如干將莫邪難與爭鋒史
官所美謂碑頌是所長余見他文亦不若是壯厲警拔
殆感憤而作故氣激于內而橫放于外者也序言邕為
荊州今新舊書但稱坐善張柬之貶福州司戶參軍韋
氏平還為左臺御史張廷珪姜皎引為御史中丞姚崇

出為括州司馬起為陳州刺史後貶遵化尉徙澧州司馬括州刺史歷淄滑汲郡北海不書嘗為荊州也

御史臺精舍碑

御史臺精舍記唐中書令崔湜撰漢承秦制御史為丞相貳其後以寺隸之憲法所在也然立精舍以居其致一於此可矣書傳所見最先包咸東海立精舍教授此在西漢末顧曄謂此佛之所舍晉漢處摩騰洛陽西建精舍為始誤也按釋書以靜居為精舍致一為精不使

雜也古之齋心服形其居必有可默存者今人猶闢屋
為齋謂如齋戒以守其獨不可以精舍名之此亦過也
蕭摩之請造興塔寺精舍詣二千石庾子興造佛寺因
立精舍嶺南源明僧紹住弇榆山棲雲精舍此皆諸梵
所居然書生立學替傳此名豈致道之所居惟精一而
後得之替魏武嘗曰譙東五十里築精舍秋夏讀書其
後徐庶折節學問精舍唐僧淵立精舍豫章阮孝緒以
一鹿車為精舍徐伯珍立精舍蒙山陳寔立精舍講授

張郡戴顓立黃鵠山竹林精舍張漢直其弟出精舍數里遇之則古人於其居也以是名之凡以求致一于學者故以名自警觀其朝夕處之可不思以致其精耶後世知釋氏所居為精舍便以為精舍皆寺也湜之嗜利蔑學其可責以此哉

盧舍那碑

盧舍那佛像記蔡有鄰書今見於世者三碑惟尉遲迴廟與此存耳書法勁險驅使筆墨盡得如意當與鴻都

石經相繼也唐志稱有鄰於八分本怯弱至天寶間遂至精妙相衛中多其蹟然則當時蓋不止三碑惜其今亡之也

尉遲迴碑

尉遲迴碑成伯璵撰世以蔡有隣書特貴其叙迴事與周史畧同然迴之死節不得顯方周之興迴已為蜀國公矣逮魏之亡一宗伯且受命舊國舊都望之無慨于懷不翅傳舍一日去之矣隋公總政天下之執可以知

也迴則不受而承制起師以興復為任其事則有疑也
豈以地居嫌疑執窮畏迫自度不能容於隋而發哉則
冤憤鬱結不得其死宜其出靈響以自見不得如口伯
璵口口也唐說自迴之死而相州都督死者前後相繼
張嘉祐既治事夜整冠危坐有自西廡出者曰余後周
尉遲迴也死於此遺骸尚存願得畢葬前牧守者膽氣
薄劣驚悸而逝非所害也又指其女子曰同瘞於此明
日嘉祐發掘得之備衣衾棺器禮而葬焉既夕出謝曰

余無他能願畢公之政節宣水旱唯所命嘉祐以事聞
上請置廟歲時血食有詔褒異今考周紀韋孝寬既平
鄴城則移相州守安陽至于碑則謂武德中朝制改葬
逮開元丁丑張嘉祐問俗郡言多崇公曰蜀國公獨為
純臣闕修殷薦其取戾也宜哉觀此自是武德改葬至
嘉祐則廟而祀之矣亦不因詔而行也與尚書故實政
戾謂神之休福則得之其謂遺骸西廡詔為廟容改葬
于開元歲皆誤也

李太白藁

藁書世傳李太白遺文或謂謝氏子弟誑武功蘓才元所書更不復詳考所出而推舉過重便謂不減魯公然此書雖少繩墨不可考以法度要是軒前輕後度越陵突令人想見酒酣賦詩時也王僧虔論書或以其人可想或以其法可存世人悉李太白名至偽書一卷亦聲價增重豈以人可想故耶

張旭千字

長史於書天也其假筆墨而有見者是得其全口而加
之手爾豈知曲直法度自成斲削間邪觀其書者如九
方臯見馬不可求於形似之間也方其酒酣興來得于
會意時不知筆墨之非也忘乎書者也反而內觀龍蛇
大小絡結胸中暴暴乎乘雲霧而迅起盲風異雨驚雷
激電變怪雜出氣蒸烟合倏忽萬里則放乎前者皆書
也豈初有見于毫素哉彼其全于神者也至于風止雲
息變怪隱藏循視其蹟更無徑轍時一豪不得誤口是

咎之昭然者已畧故耶

張長史草書

百技原於道惟致一則精復神化此進乎道也世既以道與技分矣則一涉技能便不復知其要妙此豈託於事游泳乎道者耶張旭於書則進乎技者也可以語此矣故凡於書一寓之酒當時沈酣不入死生憂懼時振筆大呼以發其鬱怒不平之氣至頭抵墨中淋漓牆壁至于雲烟出沒忽乎滿前醒後自視以為神異初不知

也今考其筆蹟所寄殆真得是哉夫神定者天馳氣全者材放致一於中而化形自出者此天機所開而不得留者也故遇感斯應一發而不可改有不知其為書也莆田方宙子正得君謨所藏張長史帖為書其後崇寧二年十一月壬申

張長史別本

見鐫於山不喪其天見蜩於林不分其神誠能知此可以語書矣嘗見劍氣渾脫舞鼓吹既作孤蓬自振驚沙

坐飛而旭得之於書則忘其筆墨而寓其神於羣帝龍
驤雷霆震怒之初矣落紙雲烟豈復知耶此殆假于物
者神動應於內者天馳耶咎崔延伯每臨陳則令田僧
超為壯士歌然後單馬入陳所向無前至僧超死則不
復能戰是知以氣勝者氣能益天下然後可以勝天下
矣宜純氣之守者萬物不得窺其蹟也

郎官石柱記

赤驥白羆一駕千里當其披崑崙上羽陵時求其逸景

於逐足下殆無遺蹤矣至于在六轡間和鑾在前塗續
在後則過君表而舞交衢進退履繩旋曲中規求其毫
釐跌宕無遺恨矣長史之書殆盡於此方乘醉時翰墨
淋漓雖驚風迅雨不能與其變俱也此詎可以規矩準
繩求哉及郎官記則備盡楷法隱約深嚴筋脈結密毫
髮不失乃知楷法之嚴如此而放乎神者天解也夫守
法度者至嚴則出乎法度者至縱而不可拘觀其倬音樹
鋒鱗勒峻磔抑左升右仰策輕揭緊趯音立闔收此書盡

之世人不知楷法至疑此非長史書者是觀其騏驎千里而未嘗知服襄之在法駕也

張友正艸字

張友正所書自云得漢人心法其用筆過為鋒長而力弱殆不可持故使筆常動搖勢若宛轉世人故自不能用今考其書別構一體自得成就雖神明潛發不逮古人然自然處正自過人也今人不知古人用筆或妄詆者不知書者也皇象曰欲見草書漫漫落落宜得精豪

斃

而究切柔皮

筆委曲宛轉不叛散者紙當得滑密不沾汙

者墨又須多膠紺黝者如逸豫之餘手調適而心歡娛正可以小展觀此便知友正用筆蓋有所本近時趙獻彥思學友正用筆至于草字已能輕舉迅速頡頏筆墨間自與握一寸筆頭拘制方寸間者異也

崇徽公主手痕碑

碑在汾州靈石蓋唐僕固懷恩女懷恩唐功臣以嫌猜叛入回鶻沒其家入後宮大歷四年以回紇請婚封為

崇徽公主下降可汗以兵部侍郎李涵往冊命唐都關
中其入回紇道至汾上此其常也然托掌石壁遂以傳
後豈怨憤之氣盤結于中而不得發遇金石而開者耶



廣川書跋卷七

欽定四庫全書

子部

廣川書跋卷八至十

詳校官中書臣孫溶

檢討臣德生覆勘

覆校官主事臣李駿

校對官主事臣張培

謄錄監生臣莊瑩

欽定四庫全書

廣川書跋卷八

宋 董道 著

魯公祭姪文

峻拔一角潛虛半股此於書法其體裁當如此矣至於
分若抵背合如竝目以側映斜以斜附曲然後成書而
古入於此益盡之也魯公於書其過人處正在灑度備
存而端勁莊特望之知為盛德君子也嘗問懷素折釵
股何如屋漏水曰老賊盡之矣前人於其隱處亦自矜

持不以告人其造微者然後得之此二體又在八法六體外乃知書一技而其法之衆至此公祭猶子文殆兼存此體者也

磨崖碑

中興頌刻永州浯溪上斲其崖石書之刺史元結撰結以能文卓然振起衰陋自以老於文學故頌國之中興頌成乞書顏太師太師以書名時而此尤瑰瑋故世貴之今數百年蘚封莓固遠望雲烟外至者仰而玩之其

亦天下之偉觀者耶嘗謂唐之文敝極矣結以古學為天下倡首芟擢蓬艾奮然拔出數百年外故其言危苦險絕略無時習態氣質竒古踔厲自將嘗曰山蒼然一形水泠然一色大抵以簡潔為主韓退之評其文謂以所能鳴者余謂唐之古文自結始至愈而後大成也

放生池碑

顏太師以書自娛平生意好惟此不替晚年嘗載石以行磐而藏之遇事以書隨所在留其所鐫石監視而考

之自公之沒名德雖在人然世豈盡知惟書于石者人得見之故今獨以書名於世或謂公以書傳流俗間至野人田老皆得名之甚至與書藝人並傳

王密碑

太師於書天得也嘗學折釵股謂得古人書法隱處余見此碑特盡之矣故為世絕藝觀太師名德偉然為天下第一忠義之發本于天性今人不得盡知惟書法入石流傳于後故世無賢不肖皆得知之益以公為善書

人也今書藝所學皆深墨重筆如指畫水印狀皆謂能學公之書矣替夫子能拓闢而不以力聞蓋以慎其所習也公於書自喜常患後世不傳則其陷流俗中亦自取其累也

摹畫贊

東方曼倩畫贊替魯公守平原時為書今其石剝剝後世復為摹搨以傳然魯公於書其神明煥發正在筆畫外若卷朱墨而印于石者此待詔書爾果有道耶公之

書幸今猶有存者更數十百年後石破字缺人間所得
皆其傳摹見者必唾而笑之其書不足傳也

新驛記

新驛記唐祕書少監李陽冰書陽冰在唐以篆學名世
自秦相李斯後號能書者不得伯仲間見也今世壯碑
巨碣尚多有之其詣絕處更無蹊轍可索碑陰有頌謂
斯去千載冰生唐時冰今又去後來者誰後千年有人
吾不得知之後千年無人當盡於斯嗚呼郡人為吾寶

之替歐陽文忠公嘗疑唐相賈耽為之蓋耽喜陽冰書
嘗為序其說文字原耽後又為滑州刺史其為刻此或
可信也余考其言蓋舒元興所為玉筋篆志謂斯去千
載冰復去矣誰能得也當盡於斯嗚呼主人則與今碑
陰或異蓋後人因其文時有改定以合此記不足怪也
雖然陽冰篆字其甚工處不盡於此而刻元興頌者獨
見此碑爾元興又謂陽冰其格峻其力猛其功備光大
於秦斯信矣則亦屢進而不止也

李陽冰篆千字

陽冰於書授法張旭世疑長史遊於顛冥之地所以離
遁繩墨而自放者也豈有蹟可求哉觀陽冰此帖得書
法三昧雖規合槩應不遁方圓至其神明合離殆無蹊
徑可蹈而循固知與長史異者形蹟之間也書家以法
相授其律甚嚴非心融神會未嘗以付始求于法不參
流動如羚羊掛角更無聲蹟逮其游于法之外斯可語
成法矣

琴銘

唐李祕監琴銘十字特奇古李陽冰小篆惟見于此琴在太常管陳儀為協律郎嘗出以示客余因摹其書今琴入禁中故世以其書貴也沈存中書曰南溟島上得一木名伽陀羅紋如銀屑其堅如石命工斲為此琴且謂琴材欲輕鬆脆滑木堅如石可以製琴所未論也觀此是括未嘗見琴其銘亦不盡見也今銘曰以為臨岳等此豈為琴材者耶或曰琴之臨岳何据曰管孫綽云

金少隱集卷八
回風臨岳刈飾流離成公綏亦曰臨岳則齊州之丹林
顏黃門曰琴首更絃者名臨岳琴必以堅木藉絃欲其
不刻入也世人既不見琴而銘又少得傳括以其書行
於世則余不得不辯

徐浩寶林寺詩

李邦彥出會稽寶林寺詩黃庭堅書其後曰法士多瓌
能奴來反乃是僧為豔爾孤岫龜形在謂山有穴而特不

可謂山余評曰此詩未有工處特以書貴季海書名唐

世而此石乃公平生書不得不尚如高閣無恢臬

音乃

詩人會意誤處黃子挾而警之是一快事謂瓌能孤岫

不害于詩黃子求人已細張子曰因進非哀表賢選能

奴來切

馮相觀禳祈禳攘災古人已如此音況能有所合

謂之能自有据耶尔足曰山有穴岫不必謂如神漢凡

山有竅穿可見者皆是故謝康樂言牕間列遠岫玄暉

言雲表吳岫徹杜甫言自多窮岫雨韓愈言點點露數

岫豈盡失也若白居易言岫合雲初吐則不可謂山聳

而出者世人多託人見聞以為已是黃子說嘗勝人亦未深考余不得不辯政和元年四月十三日

徐浩開河碑

書家貴在得筆意若拘于法者正似唐經所傳者爾其於古人極地不復到也觀前人于書自有得于天然者下手便見筆意其于工夫不至雖不害為佳致然不合于法者亦終不可語書也觀蘭亭叙樂毅論便知逸少於法度備矣此皆已出後人摹勒以傳不能盡得當時

下筆意至其合處猶度絕前輩備有書法可考則知書
到古人地位自可以法度論也替蔡邕受法於神人傳
于崔瑗瑗傳之文姬文姬傳之鍾繇繇傳之衛夫人夫
人傳之逸少自此而下各有師授逮于張旭其書分故
蔡有隣法為篆惟顏清臣徐季海守舊法而真行盡合
于古之作者至韋玩崔邈授其法而絕矣考其源流正
如禪家宗風相承各有主也後人積學不及古人而授
受又無傳嗣宜其不知古人筆意可勝歎耶開河碑令

孤絢文字季海所書也書法該備而尤妙他石知其法度所從來遠矣

徐浩題經

題經楷法最密殆於樂毅論得其結字妙處至形密執疎字細畫短故當在伯仲間然方而有規圓而藏矩未嘗利角耀鋒構成觚稜正如大匠掄材斲木就罷繩墨既陳潛刃其間求磐削之蹟殆不可見況痕瑕節目可得而求之耶季海于此可以忘情筆墨矣顧法度存者

世知什一豈論三四哉

懷素七帖

書法相傳至張顛後則魯公得盡於楷懷素得盡於草
故魯公謂以狂繼顛正以師承源流而論之也然旭於
草字則度絕繩墨懷素則謹於法度要之二人皆造其
極斯可以語善學矣昔魯男子以其不可學柳下惠之
可素于張旭吾知出此

懷素別本帖

李丕緒舊藏懷素別本有六帖筆力險絕而法度盡應
比他書若異蓋古人於用筆時一法不立故衆技隨至
而於見空時得無字相此其不落世檢而天度自全也
世人方將捉三寸柔豪籍之緹油心量形象而暗度遠
近疏密隨步武之後躡其遺塵豈復有全書者耶鄔融
嘗問素胡不學雨雷痕良久而省又問撥鐙法如何曰
如人竝乘鐙不相犯剡鋒事密射如何曰不可言也觀
其書知此法從來久矣

懷素洪州詩

懷素似不許右軍得名太過謂漢家聚兵楚無人也其
與阮籍言世無英雄使豎子成名氣亦略等矣觀李廣
射石秦人扑虎皆在氣全未分時使心一改而氣已移
雖有勇決剛果何施於用耶懷素氣成乎技者也直視
無前而能坐收成功天下至莫與爭勝其氣益一世久
矣故能致一而終身不衰也

北亭草筆

懷素於書自言得筆法三昧觀唐人評書謂不減張旭
素雖馳騁繩墨外而回旋進退莫不中節旭則更無蹊
轍可擬超忽變滅未嘗覺山谷之險原隰之夷以此異
爾今其書自謂真出鍾草出張真字不見于世惟草獨
傳當其手筆調和時忘神定氣徐起而視所鄉無前故
能迴出唐諸子右奄薄劉宋齊隋而兼有之其體製該
備顧後世不能加也北亭所書適當其逐鴻濛而問太
虛時矣至其會處乃假浪岷山放乎江之津也

高閒千字

閒之書不多存於世其學出張顛在唐得名甚顯韓退之嘗謂張旭喜怒憂悲必於書發之故能變化若鬼神旭之書其初豈能無是哉其進於知者日益遠矣指與物化而心稽者喪矣縱橫振發超忽滅沒忽乎出于前者若雨雪霜電雷轟雷激方其時豈復知喜怒憂悲而求以發之耶觀閒書者知隨步置履於旭之境矣彼投蹟無差者豈復循已棄之轍蹟而求致之哉正善學旭

者也

遺教經

歐陽永叔以此為唐寫經手黃魯直謂此書在楷法中
小不及樂毅論今世不知樂毅論已遭火而別本為薛
崇徹所藏亡于五溪其搨本皆摹畫善者則亦與寫經
手何異但此書疏肥令密密瘦令疏自得古人書意其
為名輩所推良有以也昔張翼代羲之草奏幾乎亂真
褚遂良臨寫右軍亦為高妙但恨乏自然後人不見逸

少蹟若碑刻所傳已多假偽則臨搨善工自足惑世矣
常得佛戒經其碑乃比丘道秀書與此經一體率化衆
緣共宗鐫刻則知為道秀所書但世不傳爾道秀德宗
時人其書當建中三年壬戌蓋永叔魯直不見碑陰故
所評如此

鑄鼎原銘

虢州刺史王顏撰華州刺史袁濯籀書其作銘在貞元
十一年九月至十七年韋諷復書識其後以籀為篆蓋

古者均謂之篆至秦既分殆以史籀所書為籀不足異也其曰得玉石佩於原上地深四尺得獲之黃帝去今六千四百三十年謂此上升時小臣遺墜物也此則怪矣然原上非人迹所至佩藏土下當時不得不異其說以黃帝為六千年者緯書也三皇遠矣後世推考不得其序史記雖斷自黃帝然歲月尤謬誤而緯書之說又皆臆決安可信哉但言者欲引以自神則增多奇怪亦其常也

陰真人詩

鄴都宮陰真人祠刻詩三章唐貞元中刺史李貽孫書
元豐四年轉運判官許安世即祠下盡閱其石謂此三
詩真陰氏作如還丹等皆後人託之乃屬知夔州吳師
孟書既成送觀中於是盡破礪其餘石故今世不得傳
余嘗得舊石本然獨存此也真人名長生新野陰氏本
儒生有才貌善著書其學類左元放嘗授太清神丹故
世傳其丹經贊文甚古雅亦異東漢時人不知常為此

詩也此詩雖然與漢異不知安世何据而知余益知前
所毀棄未必皆非長生所述葛洪曰長生服金液半齊
其止世間幾千年然後仙去殆古強所謂洪亦不省也

李翱題名

李子揚出貞元某年李文公題名唐之進士科目蓋自
韋肇始而兩京初未聞今考文公所書知府送皆有會
集書於慈恩石楹蓋當時等甲進士便與科名等故世
尤貴重觀韋貫之集有啓獻韓貞公乞免知進士舉當

時貞公欲以解頭目送文公謂頭須用合及等人恐不可令舉子作解頭取及第由是乃得以李翱為第一張仲素次之蓋自十人解送而九人入等時以為盛即此題名是也子揚世系蓋習之冑緒宜其保此

桐柏廟碑

唐元稹修桐柏廟碑昔歐陽永叔謂刻銘於碑謂之碑銘後世伐石刻文既非因柱已不宜謂之碑則稹書此為碑過矣古者廟中庭謂之碑故以碑為節然獨不可

以石刻文遂謂之碑嘗見伏滔功德銘曰堯碑禹碣歷古不昧范雲亦謂嘗見異書堯碑禹碣皆為籀文在崆峒山中此果足信哉余謂積為此碑亦因是為据

撫州六詠

陳公遠得戴容州臨川六詠筆畫疏瘦婉麗勁疾不在唐諸子下然世不以能書名也蓋叔倫自以詞學著聞世少見其書宜其不為人知其後識曰龍沙或疑叔倫燕人者今考新舊書皆曰豫章或曰其先蓋幽都又戴

自宋出無相及也豫章記言章江東岸沙勢如卧龍狀故叔倫詩曰鄰里龍沙北以沙岸如龍故云

絳守居園池記

文章之奇至矣作者既衆人爭務以工自見時出所長暴耀震發則其勢必至恢詭譎怪而後已金玉犀象人之所寶榱桷豫章人之所材至于大字之下常珍滿目故非奇玩怪產不足以發異觀於是海中腐石以出珊瑚溝中斷木以供犧尊唐之文敝極矣而後有韓退之

振起哀陋故皇甫湜李翱張籍輩相附而出蓋亦求海中之石溝中之木者也嗚呼能不隨人後以自樹立宜昌黎公之文獨臻其至耶

園池記別本

園池記文既怪險人患難知蓋紹述亦釋於後自昔不知故世不得考之崇寧三年余至絳州乃剔刮廁洗於

其後刻回漣

亭名

香

亭名

薪

亭名

槐

亭名

望月

亭名

柏

亭名

鵬

亭名

鷺

亭名

鷺

白鷺亭

白濱

亭名

雅

絳人姓

文安

裴姓聞喜人與雅

軌

梁姓為

正平

令

蒼塘

亭名風

亭名鼇

亭名

如此而後可以識也嘗聞八代文敝

至唐極矣以文皇之英叡房杜之才賢不能革此豈習俗已久非改心易慮盡去舊染不能扶而正也其留于今者碑刻書疏讀之令人羞汗浮淺如俳優諛語鄙俗如村野訟謀無所拔者也當時如韓退之毅然以古學為諸儒倡然其得意而人非笑之者不勝衆也蓋流俗所移非能自立者其能終不廢耶紹述之知不顧世俗者其言雖怪要不置木立塗望洋而鄉若者也

陰符經序

柳誠縣書至此極矣然人之好尚亦難齊矣李西臺愛
柳尊師志歐陽公愛高重一作唐碑惟君謨獨喜此序謂

善藏筆鋒自是書家所共恐不能盡其妙處觀其平時
論曰尖如錐捺如鑿不得出只得卻文宗問之曰凡縛
筆頭極緊一毛出即不堪用然藏鋒在得筆意非極工
於筆亦不能也宜公權戒此

金剛經

誠縣以書聞四方史謂當時中外大臣家書碑刻銘不煩手筆者子孫以為孝敬不足故昔時高麗百濟入貢齋貨貝以購書名之重後世莫及然此經本書於西明寺後亦屢改矣經石幸存不墜兵火柳玘謂備有鍾王歐虞褚陸之體今考其書誠為絕執尤可貴也

武昌詩

李衛公武昌詩其間謂牛羊具特俎則指牛僧孺楊嗣復歎夫朋黨之怨至於如此雖一話言間且不能忘必

求詆訾以逞其憾安得公天下而無私好憎之心哉德裕學優而材勝其操術近正但愾忿少容以及於禍昔牛崇為隴西主簿羊喜為郡功曹馬文淵為太守涼州云三特備具德裕嘗編牛羊日歷皆取於此

衡州門記

衡州記唐大中四年李侗為刺史因治郡署立通門刻石記其封域所本不見書撰人名蓋侗所為也其言衡陽當五領門孝于書蓋古文嶺字為領五領皆在今廣

南以衡岳為五嶺門昔鄧德明作南康記其五嶺甚辨然皆謂在南康則非也裴潛記以大庾始安臨賀桂陽揭陽為五嶺今考於古可信然二子之論雖異獨無以衡陽為五嶺者或侗自有据而衡山又有五嶺不可知也

趙璘登科記

秦始晦藏趙璘登科記書本唐人蓋筆畫工力殆出遺教經而稍為出入繩墨不拘律度內顧後世書名者未

能伯仲間見首末盡亡蓋自開元二十三年至貞元九年其間亦又有缺剥不可倫序或遺去十年或少三四年在姓名中又泯滅過半此書既久其存宜若是以趙參所紀姓名則又有異者此不能盡考也昔鄭顥當知大中十年舉宣宗索登科記顥表曰自武德以後便有進士諸科所傳姓名皆是私家記錄尋委當行祠部侍郎趙璘采訪諸家科目記撰成十三卷今所存纔六卷而亡者十七八矣雖然猶幸以書字著顯而世存之故

今得有傳也余嘗訪今藏書家并官書所籍殆無璘所
撰登科人目則此書尤可貴也因錄而藏之并以舊記
相參成十卷以傳

于範書

于範書險瘦自有體裁唐人書大抵有法而於文則或
不工末者勝也範書自序感戀增懷皆書詞所避咸通
間唐制不行於天下久矣後生不習典禮可以增歎也
梁制箋書有增懷語者不得答書答中彼此感恩乖錯

者州望須刺大中正處入清議終身不得仕唐紅亭記
立制凡稱感者徒二年其法至重梁制至唐雖未必盡
用然陸贄所定行于貞元不應咸通間盡廢知當時唐
之制度不能行于四方也

唐經生字

書法要得自然其於規矩權衡各有成法不可遁也至
于駿發陵厲自取氣決則縱釋法度隨機制宜不守一
定若一切束于法者非書也世稱王逸少為書祖觀其

遺文可以得之每為一畫則三過筆至波勢則偃筆從
字有同處初為別體若其垂露懸針磈石釵股諸體備
有至于神明煥發絕塵掣影則不謀自合此其貴也後
世論書法太嚴尊逸少太過如謂黃庭清濁字三點為
執上勁側中偃下潛挫而趯鋒樂毅論燕字謂之聯飛
左揭右入告誓文客字一飛三動上則左豎右揭如此
類者豈復有書耶又謂一合用二兼三解極四平分如
此論書正可謂唐經生等所為字若盡求於此雖逸少

未必能合也今人作字既無法而論書之法又常過是亦未嘗求于古也

盤屋尉題名

唐都關中盤屋在畿內為望至重而尉尤為要任自進士第一與賢科中選人得補然以題名考之皆自此入翰林充學士者接武不者猶為真御史世傳縣吏視口尉到而輒論其官壽所劇未嘗差蓋閱人多者自有据依惟貴人多故知者尤審也水曲曰盤山曲曰屋其取

名者如是

津陽亭詩

司馬懿征朱然於樊城車駕送津陽城門外元嘉二十五年改開陽門為津陽

然則漢以洛陽宮為名而南朝效之若蟠之言津陽即本漢之東郡

鄭蟠津陽亭詩其敘津陽門有亭舊矣疑唐亦有之但不若漢時備也東漢天子都洛其制度盛麗故典儀書洛陽二十街街一亭十二城門門一亭津陽為城門則有亭宜也

廣川書跋卷八

欽定四庫全書

廣川書跋卷九

宋 董道 著

劉統軍碑

余讀韓愈作劉昌裔碑竊疑其書謂既葬將反柩于京師知其必有誤也且既葬矣安得而反柩哉因求其碑偶存為考其文是反机于京書之所傳其謠若此豈不使後世疑耶其餘雖于義不甚相妨然因其謠誤可以復證也碑云陳許軍節度使今書本無軍字反机于京

碑無師字不可以誣碑無以字有太史之狀有太常之狀而無下有字蘇民戰敵碑為軋敵陳力應變碑為陳方僕射已都碑作以都書曰菑害碑作燭害以文考次知書本為誤乃知碑刻之傳於當時者不可誣也後世按讐不得原本因誤就譌不究其意隨己所見致文字錯亂以疑後學可勝歎哉

又劉統軍別本

元祐七年余為李平叔書劉統軍碑後明年贊皇李叔

憲復得此碑屬余考其歲月將有釋於後也按新唐書
劉昌裔始說邊將不售去入蜀楊惠琳亂說之順命拜
瀘州刺史署昌裔州佐惠琳死客河朔間曲環方攻濮
州表為判官為環檄李納剋曉大義環上其藁德宗嘉
之或謂永貞元年十一月夏州節度留後楊惠琳反明
年六月伏誅則不得順命為瀘州刺史建中三年曲環
為邠隴節度其後改陳許則不與李納同時其序錯亂
不可以据今考于碑楊琳為橫巴蜀靡涇公由游寄單

船往諭招琳後來降公不有功德宗之始為曲環起則
昌裔先在河北外論事不得用則入蜀說楊子琳得佐
瀘州子琳死始從曲環新舊書唐歷書永泰二年崔旰
攻劔南節度使郭英乂邛州柏茂林瀘州楊子琳劔南
李昌夔起兵討旰大歷二年杜鴻漸節度西川表子琳
瀘州刺史當其時昌裔實佐其州事則自當為楊子琳
但為楊琳舊書因之故不得以相亂新書以為惠琳又
以其在夏州時故謂李納僭逆歲月皆誤至謂攻濮州

蓋陳許節度李光顏其謂曲環誤也新書建中二年平
盧節度李正己卒子納自稱留後貞元八年納卒舊書
李納之為留後在大歷十一年其卒當貞元十五年以
實錄考之舊書是也舊書建中二年李洧棄其師口李
師道以州來降十一月宣武節度劉洽與神策將曲環
大破李納之衆於徐州又曰李納擁兵侵迫徐州令曲
環與劉玄佐同救建中三年李希烈侵汴州環大破希
烈軍于陳州城下擒其驍將翟暉以功加兼陳州希烈

平環兼許州貞元十五年環卒上官況代之況卒軍中
推昌裔遂代節度碑謂新帥不牢劄勳將逋則吳少誠
薄城況欲遁去皆於碑可以考之後世不求其事惟史
所錄據以為信則安得無誤歐陽公嘗以碑考史書謬
誤若此之類是也

田弘正家廟碑

唐文敞至韓愈始變而知所守後世學退之者惟歐陽
永叔獨探其源余考田弘正碑蓋其傑然自出拔乎千

百歲之上者永叔嘗得此碑以校集中誤字三處曰銜
訓事嗣考其所出雜比成章錯綜而不亂信其有得於
此又曰降以命書奉我王明必以集為誤者余則不得
信於此也以降命書不得如集所傳天明施于君為不
類不若王明之切當而有据也今碑為非是則不可謂
天明以降為工於集所著而傳則不可碑雖既定其辭
而後著之石此不容誤謬然古人於文章磨鍊竄易或
終其身而不已可以集傳盡為非耶觀其文當考其詞

義當不然後擇其工於此者從之則不得欺矣今天下知文公者莫如文忠公文忠謂是人不敢異其說況碑為當世所書人豈可盡告而使知耶今人得唐人遺藁與石刻異處甚衆又其集中有一作某又作某者皆具後竄改之也嗚呼知退之者益少今惟文忠為得其要其說猶然其下一等又可知矣

徐偃王碑

徐偃王碑昌黎韓愈撰徐放書碑故在集中以其文相

校不失蓋碑近而傳者衆故得不誤愈於此碑序事淹
該華實不似黃陵等碑錯雜無序駸駸上薄漢周不造
其極則不止魏晉宋齊隸牴殆盡略無餘習可謂至矣
昔人嘗謂公於文渾然一出於己不蹈藉前人橫驚直
肆恢奇衍溢今考其言曰徐不忍鬪其民北走彭城武
原山下百姓隨而從之萬有餘家因號其山為徐山此
即范曄漢書全用其語偃西王母事盡錄穆天子傳朱
弓赤矢采祥瑞志然則愈於文蓋亦未嘗不用前人語

但使人不覺如己出也其曰故制樸角昔人嘗改為楠
淮南子曰堯樸角不斲素題不斲愈於書無不用也

平淮西碑

唐平淮西碑翰林學士段文昌撰安定李元直官朔方
得於定武余感而歎曰明娘子奢莫之媒也嫫母力父
是之喜也昔韓愈受詔為文開鑿渾元索功玄宰益精
金百汰愈鍊愈堅其植根深其藏本固發越乎外其華
燦然不可掩已自漢以後無此作也帝子不慧過量其

夫且嬌姍之苟以大功尸於私室夸耀寵靈要求命數
惟意私之則破其碑以仆於道時君世宰暗愚自將則
受以改命文昌庸伍安知為文氣質衰陋無復經緯雖
組織求麗而綱領失据正如江左俗學以麗偶自矜借
使一時女子無知朝廷之間君臣論議又出一女子下
耶借使在朝無人庸鄙暗劣文昌其可承詔為此哉昔
李商隱讀愈平淮西碑謂如元氣正賴陶化庶類而當
時不容況一日得行其道吾知其不得存矣或謂不叙

愬功考其言用夜半至蔡破其門取元濟以獻盡得其屬士卒豈嘗泯沒無傳顧愈以裴度決勝廟算請身任之帝黜羣議決用不疑此其所取遠矣劉禹錫知名于時嘗忌愈出其右貞元長慶間禹錫隨後以進故為說每務詆訾且謂文昌此碑自成一家其自快私意如此又謂柳宗元言愈作此碑如時習小生作帽子頭以紉綴其文且不若仰父俛子以此為上下之分宗元嘗推愈過揚雄不宜有此語皆禹錫妄也

羅池廟碑

文公叙羅池事亦既異矣夫鬼神茫昧幽眇不可致詰
聖人闕而不言惟知道者深觀其隱自理得之然不以
示人恐學者惑也昔殷人尚祭祀事死以生其敝小人
以鬼則立教御俗可不慎耶嘗觀文公守儒道甚嚴以
世教為己任其論武陵謝自然事勇決果斷不惑於世
可謂能守道者至羅池神則究極細瑣惟恐不盡豈亦
蔽於好奇而不能自己耶

為李文叔書羅池碑

羅池之文至矣來者不能加也其以子厚正直為神誤
矣昔歐陽文忠學文公而知至者嘗評田弘正碑銜訓
嗣事為譌必曰事嗣則語參錯而雜比故能起而振也
余讀此碑至牛繫輓下引颿上檣益知簡鍊差擇其精
至此信天下之奇作然永叔謂春與猿吟兮秋鶴與飛
疑碑之誤此最退之用工處不知何故反於此疑之考
銜訓事嗣退之便是一體得於彼而失於此蓋亦不思

也

為陳中王書羅池碑

佛經言人之生死變化出入六道中蓋上修則天神果
下墜則阿修羅果然天中極樂修羅極苦以樂苦相求
者皆有極盡惟修泥洹果者然後出此柳子厚浮躁進
搏得罪其時以忿恚憤怨死若在正法中墜修羅界宜
也今西方諸國尚神為俗各有名號以祈福祥惟女國
正名為阿修羅蓋西域以神人為修羅其自有名者以

其所顯者得名號稱之正如羅池之類是也愈不讀佛書不知其果如是方且叙其怪變謂聰明正直也

黃陵廟碑

黃陵碑世以其書為重石久缺剥字滅幾半矣近人以其完本售至數萬謂傳師此書特謹重有法不與他石並也歐陽永叔嘗得其碑謂降小君為夫人据碑為定其餘猶有可證於書者今考於禮如夫人之為小君自不失正豈書猶可疑也又若陟方等語大不合於書矣

退之於文嚴整密緻故語妙天下余於黃陵碑疑之詞
不整比而辨事謬誤不知何為至是其謂張愉曰且使
後世知有子名加此於人其誰受之耶穆宗詔曰張愉
學古人仕甚修飾河西有政聲次於李諒則愉之名不
待愈而後世知之矣

又黃陵廟碑

博士王持國得韓愈撰黃陵廟碑甚完其字無譌軸而
藏之屬余書其後余謂黃陵文見昌黎集人皆可得惟

碑以沈傳師書為貴，父則字剝缺不可讀，故其完本難得。余嘗考昌黎之文，閎深浩博，不與世人同機軸，卓然自成一家。獨於此碑，雜碎無統紀，文氣亦不純，而格韻不類。蓋其辨湘君已失，故其言亦自畔不得經意。湘君即舜妃，夫人為女英，以楚詞可得知之。古者天子建后，其以娣姒從者，雖皆同姓，自當為夫人。此禮也。郭璞疑帝舜之后不當降小君，夫人愈謂有小君，故正得稱君。夫所謂君即小君也。后夫人配君，故天子國人稱之謂

君則后謂小君降天子也舜不立正妃二女以長幼為序不言后豈后之下復為小君以稱此非禮也惟諸侯之妃天子封之曰夫人故國亦以小君稱之對諸侯以自稱於國也書稱舜曰五十陟方乃死禮曰天子登遐釋詁曰隲假格陟躋登升也則登遐升遐同文舜為陟方自是南巡狩凡行必謂陟蓋往而升也不謂地有高下而陟降異詞周公稱成湯曰禮陟配天自是殷禮能升配天享國不宜遂以為陟而死也今曰陟文句為盡

而謂方乃死者此不成語愈書誤以竹書雖以陟為升
謂升遐也不得於此取之觀愈於此碑時用工深故博
考而詳取蓋求之太過牽強取合固宜忘失本意

李干墓誌

唐太學博士李干誌河南李仲微得其碑以傳然其文
自見昌黎集中惟碑少見故仲微貴之其書李翱亦可
臧也志曰字子漸集無此又以柳賁為泌與集本異者
唐憲宗紀自作柳泌知李道古誌與此皆誤此誌甚罪

干以丹砂受賁之術以死且以為世戒也又敘歸登食
水銀火射竅節以出李虛中服硫黃致疽發於背李遜
且死始知藥誤孟簡自以得不死藥二年卒盧垣溺出
血肉李道古亦以柳泌藥死海上觀其說者自令聳懼
震恐可終身守之且世亦知尊生矣其壽宜不死卒以
得死雖甚暗庸不此為也或傳退之晚歲頗嗜硫黃卒
以此死白居易曰退之服硫黃一病竟不痊居易言可
信也立論以戒世求世必信公乃自蹈於此何哉余意

以血氣既耗不得如向之時方幸扶衰救疾以冀朝夕近功不知其患已如干也可以一歎哉

孔幾志

孔幾志稱幾平生節操有古人風使作者無愧詞亦使人知以銘誌為貴也考廣德王碑其敘亦備矣當幾為華州刺史奏江淮進海味道路擾人憲宗以其言忠詔除嶺南節度其事見於嶺表者韓愈盡道之獨不及華州事則誌不得而具者其序當然也嘗見隋煬帝時責

貢四方而海錯出尤盡當時如鮓魚蝦子含肚鱸魚乾
膾密擁劒桂蠹鯉腴動輒千品勞人殄物至江淮絕魚
雖欲不亡其可得耶或曰使得其臣如幾輩在左右當
無此患是不然諫幸江都如任建宗即日朝堂擢鳥果切
殺之矣然則人臣進諫亦會逢其時爾非憲宗之明其
說果得行乎

處州孔子廟碑

處州夫子廟碑唐咸通四年刺史王通古重立以傳考

之李繁作學官處州當元和二年至僖宗而碑已廢後世以昌黎公文可傳故又刻石於學使世存之昔歐陽文忠公謂隋唐之際天下州縣學皆廢且文公見官為立祠州縣莫不祭之則以夫子之尊由此其盛嗚呼禮之廢久矣皮弁祭菜示敬道也周之制凡始立學必釋奠於先聖先師禮曰始立學者既饗器用幣然後釋菜不舞不授器夫釋奠有樂釋菜無樂鄭康成謂釋菜於詩書禮樂之官釋奠於先聖魯之錫成王以天子禮樂

祀周公安得祭於學哉然則先聖祀孔子可也當三代
盛時夔伯夷世為先聖祀於諸國必有合也至漢始以
孔子祭於學天子親祀自晉成帝至唐武德定著於令
其禮稍重范甯請用王者儀而范宣之議當其釋奠用
帝王禮樂然謂釋奠真幸存不以四時為祭今又無樂文
忠公据後世苟簡便謂禮有不足則誤矣昔貞觀中始
以孔子為先聖永徽定令復用周公為先聖黜孔子為
先師然文公遽以句龍棄得常祀無如夫子盛文忠謂

孔子後天下皆以為先聖豈亦不知考於古耶開元詔曰昔緣周公南面夫子西坐自今後夫子南面而坐內出王者袞冕之服衣之制詔丞相冊封文宣王於是列戟而以門人配焉其曰南面用王者事巍然以門人為配豈古實行之嘗怪二公於此不知考古使後世疑之此可歎也

廣川書跋卷九

欽定四庫全書

廣川書跋卷十

宋 董道 著

同光四年宣

中書謂之草樞密院
謂之底三司謂之宣

昨以鄴都叛亂須議濟師相次更委嗣源同謀翦滅不
意忽因深夜寨內驚騷遽至紛紜權罷征討其城下一
行大軍除鄴都側近分屯守把外李紹榮並部領且歸
闕下見別舉王師攻取次兼李嗣源李紹貞等為緣軍
亂自負憂疑不欲回赴闕庭又未盡聞行止恐是卻歸

鎮府排齷軍都向背未知隄防宜設竊知恐有潰散兵士逃背軍都結構兇徒奔突城鎮右奉聖旨令諸處更切誠嚴師旅管內遍切指揮各令守把城池安存戶口常加警備勿失機宜仍須不住差人探候每事機飛狀申奏付晉州準此同光四年三月十七日宣樞密使李樞密使張天子降書命於下有策書制書詔書誡書策書起年月日稱皇帝曰此命諸侯王三公制書其文曰制詔三公赦命令是也詔書詔告也有三品其文一曰

告某官某如故事二曰省奏事三曰羣臣有所表答也
已奏如是奏是也誠言誠敕刺史太守及三邊營官被
敕文曰有詔敕某官是為誠敕自唐以樞密院領兵事
始以宣自別于命余嘗得梁宣底考之知其制自唐末
至五代而行之當貞明時李振為樞密使凡宣傳上旨
以行于外而錄于其院則謂之宣底而後樞密院以其
與敕異事故以其詔命謂之宣其制於事後具月日臣
某宣晉改樞密承宣以就其制今考其同光四年三月

宣其書蓋與梁同制也河南石溫叟得後唐同光四年三月宣余因考之貞明宣底見五代之制蓋自唐末相承如此梁以李振為樞密使其宣上旨以行於外而錄其事藏之故中書省以勅樞密院以宣各有制度其宣則於事後具年月日宣如唐告宣奉行而石氏所藏樞密院具姓此制則唐所行宣而錄其底以藏與梁宣底同也昔宋次道論繫月日姓名者乃所以為底今樞密尚用之皆作卷軸連藏而同光宣以御前寶璽印出蓋

其所行以出者與其留底皆用寶也雖其一時搶攘蓋
有司存焉不容其制相亂當唐莊宗遣李嗣源以取魏
州謀議出此其至竄亡可坐計也方且召李紹榮還闕
而恐嗣貞走鎮天之所誘悖謬其心此宣可以資後世
一笑當其以兵武擅天下謀畫計決應於事機不可謂
暗於前計滅梁纔三歲爾當皇甫暉以效節軍脇制在
禮陷鄴都初命李紹榮討之邢州亂又以李嗣貞將而
討其州將趙太紹榮攻鄴無功莊宗欲自將牽於孽后

不能決方其時明宗以疑自嫌不能釋於猜携乃授以師徒余竊怪其取禍以逞求自速也方軍變於魏時而紹榮猶守城南紹貞乃辟西北隅明宗託偽還鎮州紹貞勸帝以兵南下莊宗死汜水而此宣方進紹榮明宗果欲歸鎮豈不知紹貞幸福以激變而求其自託於嫌在禮反於魏軍以旁引壞詔劉氏謂小事可趣紹榮指揮此可為長太息也始莊宗與梁軍相持會賀正入附遂得魏而梁由此亡及得天下以王正言守之此不幾

于以天下為戲哉其籌畫算計皆不足論其措置施設所以成其亂者可以為後世戒以見五代之亂非天不悔禍蓋人謀召患雖天心之仁不能拯而救也其稱樞密使即張居翰李紹宏也其言紹榮元行欽也紹貞者翟彥威也皆唐之賜姓號養子莊宗所仗以成功者也

李後主蚌帖

江南當五代後中原衣冠趣之以故文物典禮有尚於時故能持國完聚一方豈徒然哉觀此帖下屬州責蚌

醬猶有古義知以宗廟為重恐滋味齏

玉篇昨丹切

醬

玉篇而琰

切味薄也

其下惶遽供命不敢寧固知禮有貴於行事者也

漢律會稽歲獻鮓

巨乙切

醬二升以說文求之鮓為蚌知

此為宗廟祭久矣然謂漢有舊儀豈以此耶

李國主集賢院書

江左書兩等紙用澄心堂所作穀皮細鈔其上本入中
隱堂備親覽者為御府書其下入文館以廣圖籍書有
楷法而字頗校讐今散落人間往往收藏為嘉玩其書

有楷口等亦與供進者絕異晉有中祕書而又有外庫
悉異紙札故虞預言祕府中有布紙三萬餘不任寫御
書而無所給請四百枚付著作作書史寫起居注然則書
紙有等自昔然也

為張潛夫書官法帖

觀書似相家觀人得其心而後形色氣骨可得而知也
古人大妙處不在結構形體在未有形體之先其見於
書者託也若求於方直橫斜點注折旋盡合於古者此

正法之迹爾安知其所以法哉淳化中詔以祕閣所藏書入石又以翰林待詔王著摹字求其書法之外各有異處殆不可得至於行筆利鈍結字疎密時可見之然決礫鉤剔更無前人意皆著之書也其後得祕閣墨書按其字畫皆硬黃摹書至有墨色烟落或以重墨添暈當著奉詔時其所摹搨皆略放其大體而私以筆畫成之宜其用筆略無古人遺意不足異也觀王洽書逸少謂不減己落簡揮毫有郢匠成風之執王珉書獻之謂

騎驢駸駸欲度驂騑前今視官帖二人書畫雅有相類而洽更自劣弱珉書則與子敬更不可辨皆硬黃偽誤少真而摹傳者遂成一體也今人不知其故憑石本便評定書畫至於放言立論更無疑處此與觀景而論形神以為某勝某劣何以異哉

為方子正書官帖

世疑官本法帖多弔喪問疾蓋平時非問疾弔喪不許尺牘通問故其書悉然余求之故不當爾也唐貞觀嘗

購書四方矣一時所得盡入祕府張芝鍾繇張昶王羲之父子書至四百卷漢魏晉宋齊梁雜蹟又三百卷惟喪疾等疏比之凶服器不及入宮故人間所得者皆官庫不受者也唐世兵火亦屢更書畫湮滅不能存其一二逮淳化中詔下搜訪已無唐府所藏者矣其幸而集者皆唐所遺于民庶者故大抵皆弔問書也

石曼卿書

世以曼卿跡弛不羈故其乘一時豪氣所感豈提鉞懷

槩者所能模放耶觀其論天下事無不公當後數十年
其言益信可用精思者不能過也潞子城有曼卿所書
益寶元七月是時朝廷始以曼卿所上民兵為可行故
得與吳遵路同籍河東兵至此迄今六十五年本道再
置使按民兵其說正當時所議而西河師中適為上黨
尉初得其書摹石此豈亦有數耶

畫錦堂記

運筆柔則無芒角執手寬則多緩弱點掣短則法臃腫

點掣長則法離漸畫促則字勢橫畫疎則字形慢拘則
乏勢放或少則純骨無媚純肉無力少墨浮澀多墨萃
畢采切萃萑
草叢生也鈍書病如此其衆惟積學漸成者當求擺

脫入究竟三昧此宜有墨池筆塚終身于是然書法須
得天然至功力亦不可棄王僧虔曰宋文帝書自謂不
減王子敬時議天然勝羊欣功夫不及便知力學所至
不可廢也蔡君謨妙得古人書法其書畫錦堂每字作
一紙擇其不失法度者裁截布列連成碑形當時謂百

衲本故宜勝人也

書萊公事後

李化光書王世弼事其言萊公主陰官若王者居巍然
正坐侍列至衆曰此王也命弼拜既寤稍露其語故化
光得書或問秀師曰此脩羅地也佛法脩羅下人天一
等或疑公之正節直行當入天神今乃在修羅何耶廣
川董某曰子謂主陰官者為生大海心而下劣者耶亦
將謂鬼趣所攝而從卵生者耶若公之蹈難不顧死以

忠力再造王室此與執持世界力同無畏蓋與帝釋梵
王居者不知公在天趣矣子無疑其如在離溝下竈洗
陽倍鮭沈水海口以恐懼驚動疑俗求敗鼓喪豚者為
公之靈響耶

顏泉記

余見李勝作顏泉記昔文姜事姑則異一日泉發其居
遂廟食於此或曰昔李陽冰嘗尉淄川刻碑廟中今所
書蓋據李監說余往來求陽冰記不得其後得破石僅

尺蓋為礎或視之書字可讀按其說文姜姓顏餘與今
廟中刻石所記無異嘗見唐李亢作集異記書文姜事
姑以孝謹樵采之外汲山泉以供飲一旦緝籠之下湧
泉清冷可愛時謂顏娘泉李亢所記後世據之按顧野
王輿地志謂顏文妻也事姑感得靈泉生於室內常以
緝籠蓋之姑出籠即泉涌居宅時號籠口水野王所記
自是當時所傳李亢以為顏文姜誤也今考地記淄川
為齊邑唐武德分於齊郡而為州治當唐陽冰為尉於

郡邑其事不妄而謂顏氏文姜則不得其實按此水本號萌水出甲山東北逕萌山西注般陽入于隴下與齊水合者萌水口也不知兗陽冰在唐世猶不得其水名而輿地志固已辨其出可無信耶余修官書見熙寧中封顏文姜為順德夫人當時不知詳考但据李兗所記此其失也

寶章集

上山斫檀櫨

選雞切

櫨

呼奚切櫨櫨木細葉似檀今江東有之

先殫謂山無

檀則不可謂檿櫨果足用為檀則世亦不能自罔也昔
神龍中王方慶上其祖導洽珣仲寶騫規獻之二十八
人書離卷為十詔賜其書號寶章命崔融為序復還方
慶當時所集大小差次不能比櫨相倫隨其廣狹高下
為卷其後散逸世人各復一二得之淳化所上帖已有
雜出是集者矣元符中祕閣復以至道後逮紹聖間所
購書摹石寶章集盡刻之余嘗見墨蹟盡作硬黃紙次
第屈測入屣直立切玉篇如梵經亦甚整理此乃唐人

臨搨者世人以其石刻出祕閣比他石為難得乃剔取寶章一卷別出謂真方慶所上也導洽珣書自有存者世或得之不於此求而競從於偽因書其末崇寧三年十月為宗子大年書

為邵仲參書寶章集

古人論書要識書家主人則妄誤者故常奴爾亦何至亂真耶後世於書既失眼目而摹搨轉偽則雖欲如古人懸斷真偽不復得也故常求辨其縑紙所因以識其

世先後其間甚偽者可以辨至工於臨搨而得舊縑紙者則不能盡知服虔謂方絮曰絮蓋漢紙如此古人治紙要自有法故以縑帛依舊書長短隨事截之則為幡紙以生布作紙絲口縱故名麻紙以樹木皮作紙名穀紙至釁汁涅染點治槌裝則為經紙自漢魏遺字多作幡紙晉宋多作麻紙而隋唐用經紙今世所見宋晉帖多作經紙硬黃此於真偽可以不論也余見祕閣寶章集悉為經紙摹書然武后既復以賜方慶則留于御府

者當時所臨搦者也不然公家何處得此然有法度陵
驟迅快故知為能書也

僧伽傳

蔣穎叔作鍾離景伯書廬江劉良以示余考之僧伽本
天竺人龍朔初至中國景龍四年入滅蓋年八十三矣
此以舊傳韓退之詩知其瑰奇不可少貶其謂李太白
嘗以詩與師論三車者此則誤也詩鄙近知非白所作
世以昔人類在集中信而不疑且未嘗深求其言而知


其不類余與之校其年始知之太白死在代宗元年上
距大足二年壬寅為六十年而白生當景龍四年白生
七歲固不與僧伽接然則其詩為出世俗而復不考歲
月此殆涅其服者託白以為重而儒者信之又增異也
龍朔元年至景龍四年以唐歷校之為五十年知僧伽
在西方時三十三年矣余以舊傳知之

魯直烏絲欄書

翟湛嘗以烏絲欄求豫章黃魯直為書蘇子瞻陶淵明

詩字尤用意極於老壯態不似平時書但烏絲治之不得法礙口磔決頗失行筆勢蓋縑帛不如昔也往見晉宋諸人謂縑素之工殆絕於昔惟王僧虔尋得其術雖不及古不減郝家所製當時書縑自別是一機杼故能傳久遠如此觀張芝有縑素書傳於唐而張昶毛弘亦傳縑素書後人得其舊本便知其異也今為烏絲不如昔工又澀緩有浮顚槌練得柔滑加繕治然後可用不若紙也唐許渾以烏絲欄書其詩為集然則豫章書東

坡詩便為有考於古也



廣川書跋卷十